

HASiL/2026/02/11 - 12

HASiL TERUS SOKONG AGENDA MADANI MELALUI PEMBANGUNAN DATARAN NIAGA KAMPUNG MANJOI

PERAK, 11 FEBRUARI 2026 – Komitmen Lembaga Hasil Dalam Negeri Malaysia (HASiL) dalam memperkasa ekonomi rakyat dizahirkan melalui perasmian **Dataran Niaga Kampung Manjoi, Perak**, sebuah inisiatif di bawah **Program Kampung Angkat MADANI** yang menyediakan ruang perniagaan lebih tersusun dan kondusif kepada peniaga tempatan.

Dataran Niaga yang dibangunkan di tapak Pasar Baharu Manjoi, Jalan Seri Tanjung ini merupakan lokasi yang sekian lama menjadi nadi aktiviti ekonomi dan sosial penduduk setempat. Menerusi peruntukan berjumlah RM500,000.00 yang disalurkan oleh Kementerian Kewangan (MoF), tapak Pasar Baharu Manjoi kini dinaik taraf menjadi sebuah dataran niaga berdaya saing, selesa dan selamat untuk peniaga serta pengunjung.

Kerja-kerja pembangunan bermula pada 25 November 2025 dan siap sepenuhnya pada 31 Januari 2026. Projek ini dijangka memberi nafas baharu kepada kawasan Pasar Baharu Manjoi, menjadi pemangkin kepada pertumbuhan ekonomi setempat dengan membuka lebih banyak peluang keusahawanan dan meningkatkan taraf sosio-ekonomi komuniti. Dalam majlis itu, HASiL turut mengambil kesempatan

menyantuni penduduk setempat dengan penyerahan bakul makanan kepada 30 orang asnaf terpilih.

Majlis perasmian telah disempurnakan oleh YBhg. Datuk Dr. Abu Tariq bin Jamaluddin, Ketua Pegawai Eksekutif HASiL, dan turut dihadiri oleh YBhg. Dato' Hj Mohd Zakuan bin Hj Zakaria, Pengarah Pembangunan Negeri Perak, Unit Penyelarasan Pelaksanaan, Jabatan Perdana Menteri, YBrs. Tuan Zulhisham bin Ahmad Shukori, Pegawai Daerah Kinta, barisan pengurusan HASiL, pemimpin komuniti setempat serta wakil penduduk Kampung Manjoi.

Dalam ucapannya, YBhg. Datuk Dr. Abu Tariq menyatakan bahawa HASiL sentiasa menyokong usaha yang memberi manfaat langsung kepada rakyat. Pembangunan Dataran Niaga Kampung Manjoi mencerminkan kerjasama jitu antara kerajaan dan komuniti setempat mampu merancakkan ekonomi tempatan serta meningkatkan kesejahteraan masyarakat. Tambah beliau lagi, selaras dengan agenda MADANI, HASiL akan terus memainkan peranan aktif dalam memperkukuh pembangunan komuniti yang inklusif dan berimpak jangka panjang.

Untuk rekod, Program Kampung Angkat MADANI diperkenalkan dalam Belanjawan 2024 bagi meningkatkan akses kemudahan asas dan perkhidmatan kepada komuniti melalui pendekatan *Whole of Government*.

Inisiatif ini diharap dapat memperkukuh hubungan antara HASiL dan masyarakat setempat serta menyumbang kepada pembangunan komuniti dan pertumbuhan ekonomi yang mampan, selaras dengan aspirasi negara.

Sebarang pertanyaan serta maklum balas, sila hubungi kami menerusi:

- a) Hasil Contact Centre (HCC) di talian 03-8911 1000 / 603-8911 1000 (Luar Negara);
- b) HASiL Live Chat; dan
- c) Borang Maklum Balas di portal rasmi HASiL di pautan pantas <https://maklumbalaspelanggan.hasil.gov.my/Public/>

SEKIAN, TERIMA KASIH.



Dikeluarkan oleh:

Jabatan Khidmat Korporat

Lembaga Hasil Dalam Negeri Malaysia

Hasil Contact Centre: 03-8911 1000 / 603-8911 1000 (luar negara)

Portal Rasmi : www.hasil.gov.my

Tarikh: 11 Februari 2026

LAMPIRAN



YBhg. Datuk Dr. Abu Tariq bin Jamaluddin, KPE HASiL menyampaikan ucapan sempena perasmian Dataran Niaga Kampung Manjoi, Perak.



KPE HASiL bersama dengan YBhg. Dato' Hj Mohd Zakuan bin Hj Zakaria, Pengarah Pembangunan Negeri Perak serta barisan pengurusan kanan HASiL dan pemimpin setempat mengambil gambar kenang-kenangan.



KPE HASiL, diiringi oleh YBr. Tuan Zulhisham bin Ahmad Shukori, Pegawai Daerah Kinta menyerahkan sumbangan bakul makanan kepada salah seorang penduduk Kampung Manjoi.



KPE HASiL telah meluangkan masa menyantuni para peniaga di Dataran Niaga Kampung Manjoi dalam satu sesi lawatan ke dataran niaga tersebut.



Sempena perasmian Dataran Niaga Kampung Manjoi, HASiL membuka kaunter Sumbangan Tunai Rahmah (STR) bagi memudahkan pengunjung mendapatkan maklumat dan bantuan yang diperlukan.



Pemandangan suasana Dataran Niaga yang telah siap, menjadi ikon nadi aktiviti ekonomi dan sosial penduduk setempat.